



## **Bases do premio MELLOR PROXECTO TIC CON BENEFICIOS SOCIAIS 2019**

### **OBXECTIVO DO PREMIO**

A **ASOCIACIÓN DE ENXEÑEIROS DE TELECOMUNICACIÓN DE GALICIA (AETG)**, en colaboración coa **AXENCIA PARA A MODERNIZACIÓN TECNOLÓXICA DE GALICIA (AMTEGA)**, convoca unha nova edición do **premio MELLOR PROXECTO TIC CON BENEFICIOS SOCIAIS 2019**, destinado a recoñecer os mellores proxectos no ámbito das Tecnoloxías da Información e a Comunicación que contribúan e aporten beneficios á sociedade.

Preténdese con este premio distinguir as iniciativas de innovación social con base tecnolóxica que desenvolvan solucións no campo da accesibilidade ás Tecnoloxías da Información e a Comunicación apoiando a inclusión dixital e a igualdade de oportunidades a colectivos específicos ou á sociedade en xeral.

Deben estar especialmente destinados a potenciar o fomento das Tecnoloxías da Información e a Comunicación (TIC) facilitando a súa utilización para contribuír deste xeito á diminución da fenda dixital, poñendo en marcha iniciativas empresariais ou sociais de desenvolvemento, fabricación ou servizos, que incorporen un elevado nivel do uso das TIC con produtos e/ou servizos que melloren a calidade da vida das persoas.

Os proxectos deberán dar resposta a demandas sociais dirixidas á mellora de áreas concretas, ou ben estar dirixidos ao benestar e a calidade de vida das persoas e da sociedade en xeral. Valoraranse especialmente aqueles proxectos que atendan a colectivos en risco de exclusión dixital.

Estes premios buscan destacar o recoñecemento público das boas prácticas na área das TIC como factor de mellora continua da nosa actividade social e recoñecen as vantaxes da aplicación da tecnoloxía en proxectos con impacto social positivo.

O premio de Mellor proxecto TIC con beneficios sociais 2019 é un incentivo para recoñecer as accións emprendidas por empresas, entidades ou particulares para que as persoas e comunidades sexan cada vez máis dixitais mediante o acceso, uso e apropiación das TIC.

### **CARACTERÍSTICAS DOS PREMIOS**

O Premio ao mellor proxecto TIC con beneficios sociais terá un carácter honorífico. Entregarase unha placa conmemorativa e difundirase o premio e a actividade do gañador a través das canles de comunicación corporativas.



Así mesmo, o xurado resérvase o dereito de declarar o premio deserto no caso de non recibir candidaturas que cumpran os criterios de calidade esixidos.

A participación no Premio ao “Mellor proxecto TIC con Beneficios Sociais 2019” supón a aceptación íntegra das presentes base

## BENEFICIARIOS

Poderán concorrer a este premio, as persoas físicas, entidades ou pequenas e medianas empresas, tanto de forma individual como conxunta ou con traballos de equipo, con sede en Galicia.

## ÁMBITO DA CONVOCATORIA

- Cada empresa, persoa ou entidade poderá presentar unha ou máis candidaturas.
- Os proxectos poderán presentarse de forma individual ou colectiva, se fosen desenvolvidos en colaboración.
- Poderán aspirar ao Premio aqueles proxectos do ámbito das tecnoloxías da Información e Comunicacions que:
  - Estean destinados a potenciar o fomento das tecnoloxías da información e comunicación (TIC) accesibles, a diminuír a fenda dixital a través da aplicación e uso das TIC, ou a poñer en marcha iniciativas empresariais ou sociais que faciliten solucións ás demandas sociais incorporando un elevado nivel de uso das TIC.
  - Melloren a calidade de vida das persoas e da sociedade en xeral, especialmente de colectivos en risco de exclusión dixital.
  - Fosen desenvolvidos e implantados durante os dous últimos anos e se caracterizaran polo seu carácter innovador, premiando o sentido da iniciativa e creatividade.
  - Sexan de aplicación práctica e aporten algún beneficio social perfectamente identificable mellorando a calidade de vida das persoas, da sociedade en xeral ou dun colectivo específico.
  - Estean finalizados no momento de presentar a súa candidatura.
  - Teñan continuidade no tempo, non tratándose dunha acción illada.



## DOCUMENTACIÓN A APORTAR

- SOLICITUDE DE PARTICIPACIÓN, segundo Anexo I.
- Memoria ou resumo explicativo do proxecto (máximo 5 folios). Descrición técnica do proxecto.

## PRESENTACIÓN E PRAZO DE ENTREGA

Para que a candidatura sexa admitida deberá estar debidamente cumprimentada de forma OBLIGATORIA a través da solicitude de participación posta a disposición de todos os interesados na web da Asociación de Enxeñeiros de Telecomunicación de Galicia [www.aetg.gal](http://www.aetg.gal), coa memoria ou resumo explicativo do proxecto como información complementaria.

Ambos documentos enviaranse por correo electrónico, indicando en Asunto: "Premio BENEFICIOS SOCIAIS" ao enderezo [administracion@aetg.gal](mailto:administracion@aetg.gal).

**O prazo de recepción das candidaturas rematará o 15 de abril ás 10.00 horas.**

A información consignada no Formulario de Inscripción, deberá conter o maior número posible de datos cuantitativos, e toda información adicional que se considere relevante, para permitir unha mellor avaliación.

As candidaturas serán avaliadas con base á información que se presente, o resultado desa avaliación será unha consecuencia directa da calidade da información presentada.

En caso de consideralo necesario, a organización poderá solicitar comprobación ou información adicional sobre calquera das candidaturas recibidas.

O xurado poderá descartar aquela candidatura que, ao seu entender, non corresponda á temática presentada.

## CRITERIOS DE VALORACIÓN

Despois do peche de presentación de candidaturas, o Xurado avaliará os proxectos segundo os seguintes criterios:

- Presentación e claridade da exposición.
- Calidade da proposta.
- Grao de innovación tecnolóxica ou científica.



- Resolución de retos sociais.
- Orixinalidade e carácter innovador da idea.
- Público obxectivo que se vería beneficiado pola solución do proxecto.
- Participación efectiva das persoas beneficiarias da solución TIC na definición, experimentación, desenvolvemento ou proba.
- Aplicabilidade e pragmatismo para a obtención de resultados nos colectivos aos que vai dirixido.
- Transversalidade do proxecto.
- Tecnoloxías utilizadas e madurez das mesmas, valorando preferentemente os sistemas abertos, estándares universais e gratuítos.
- Custe accesible para o usuario final.
- Fomento ou cooperación entre empresas e outros axentes implicados na cadea de valor.
- Viabilidade.
- Grao de comercialización.

## COMPOSICIÓN DO XURADO E PROCEDEMENTO DE CONCESIÓN DO PREMIO

O Xurado encargado da adxudicación do premio estará formado por cinco membros: Presidente, Vicepresidente, Secretario, Vicesecretario e un vogal. Exercerán como Presidente e Vicesecretario do Xurado dous membros da AMTEGA e como Vicepresidente e Secretario dous membros da AETG, designados polas respectivas entidades; e como vogal un experto independente elixido de común acordo entre elas.

Entre todas as candidaturas recibidas, e sempre que se axusten ao establecido nos puntos anteriores, seleccionaranse as candidaturas finalistas que serán valoradas polo un xurado. Dito xurado, que poderá ser asesorado por un comité técnico, elixirá entre os finalistas ao galardoado.

A decisión do xurado será inapelable.

## PUBLICACIÓN DO VEREDICTO E ENTREGA DO PREMIO

A entrega do premio terá lugar durante o transcurso da XXIV Noite Galega das Telecomunicacións e a Sociedade da Información 2019.